

弊無形今若又送匪人則將無蘇息之期濟州則連送之官民蒙其惠而今當  
介滿請兩邑守令並以文官擇差從之○已未以宗簿寺公事下教曰今後  
德興大院君諱字凡公事勿書○下教于政院曰老老尊賢為國之所先務時  
當歲時理宜優待其令該曹年八十以上官堂上者食物題給其職躋二品而  
無有清操者衣資酒饌並為磨鍊題給以示予軫念優異之典老職則四品以  
上有旨加資者外其餘雜堂上及納粟納銀加資者不在此中○備邊司啓曰  
伏見毛帥回咨三件事並不見許其中歲供之約物貨之傳固知未易完定而  
至於發還遼民事於彼於此利害甚明而今其所荅如此其意之所在誠未可  
曉且詔使奏本中徐敷奏所載遼民皆以為出於自己不悟其如見肺肝殊可  
惡也此事既已發端不可但已姑觀他日事勢更議處置似當敢啓從之○  
庚申太白晝見○上下教曰祥祭時內殿親往魂宮脫衰似合情禮令禮官預  
為議定禮曹啓曰五禮儀成服脫衰時無內殿同祭之禮今此下教雖合情禮  
自上行祭時百官雖不祭祭宗室有服之親承旨史官禮貌官等不可不入  
內殿幕次勢未妥當恐不如依舊例所御殿庭哭望行禮之為宜荅曰揆之  
情禮不可不往內殿幕次設於內庭可也○壬戌夜南方艮方有氣如火光○